

18. nov 2016

"Ilinniartoqarneq pillugu inatsimmik" taaneqartup naleqqussarnissaa siunertaralugu attuumassuteqartut soorlu suliffeqarnerup iluani illuatungeriit ilinniarnermullu atatillugu atuagarsorfiit atuarfiit akuutinneqarnissaat pisariaqarnerseq pillugu apeqquteqaat allaavigalugu oqallinnissamik siunnersuut, taamaasiornikkut qularnaarumallugu, inatsisip ingerlalluarnissaa taamatullu Inatsisartuni amerlanerussuteqarluartunit innuttaasunillu tapersorsorluarneqarnissaa.

(Demokraatit Inatsisartuni gruppiat)

Siumumiit Demokraatit gruppiata apeqquteqaat aallaavigalugu oqallisissiaanut paasinninnerput naapertorlugu imaattumik oqaaseqaateqassuugut:

Siumumiit suulluunniit inuup ilinniarsinnaasai aammalu ineriartuutigalugillu ineriartortissinnaasai pingaartilluinnarlugit siuarsarnissaat ingerlattuarsimagatsigu, aammalu sulilu ukiuni makkunani qulequttap matuma qaqqinneqartup tassa ilinniarsiit sungiusarluni suliffinnik misiliisarnernik imallit annertuumik sulissutigigatsigit aallarniutigalugu oqaatigissavara! Taamatutaaq aallarniutigalugu Siumumit anguniakkagut pingaartumik inuussutissarsiutitigut ilinniarnep iluani taakkartorlugit aallartissuunga:

Kikkut tamarmik ilinniarsinnaanissaat Siumup anguniarpaa!

Ilinniarnep siunissamat aningaasaliineruvoq, taamaattumillu ilinniarnermut ilinniaqqinnermullu kikkut tamarmik periarfissaqartuarnissaat anguniartariaqarpoq, nunatsinni, nunattalu avataani ilinniartut atugaat inissaqartinnissaallu isumannaarneqassaaq. Ilinniartunullu meerartalinnut inissaqarnikkut meeqqerivikkullu atugassaritneqartut pitsanngorsarneqarnissaat Siumumiit anguniagaraavut.

Ilinniarnermut aningaasaliinerunissaq Siumup sulissutigaa. Suliffinnik nutaanik aallartitsiniarnissaq siunertaralugu ilinniarfimmik pilersitsinissaq anguniarneqarpoq. Inuussutissarsiornikkut ilinniartitaaneq annertusarneqassaaq inuiaqatigiit pisariaqartitaat aallaavigalugit inuussutissarsiornermilu susasaqartut suleqatigalugit.

Ilinniartitaanermut Siumup anguniagaaraa sumiiffiit aallaavigalugit ilinniarnissamat neqerooruteqarsinnaaneq. Ilinniarnermi avatangiisit nukittuut piorsarneqartariaqarput, qaffasissumik pitsaasumillu tunngaveqartut. Tassani aallaaviuvoq inuusuttut najukkaminut qanittumi ilinniarsinnaanissamik periarfissaat.

Suliffeqarnermi suliniaqatigiiffiit suleqatigalugit ilinniarsimasunik sulisoqarnikkut pisariaqartitsineq naammassiniarlugu ilinniartitaaneq annertusartuarneqartariaqarpoq inuussutissarsiutit sulisutigullu pissutsit aallaavigalugit.

Nunanik allanik ilisimasaqarneruneq anguniarlugu ilinniartut nunanut allanut suliffimmik sungiusariartarnerat nittarsaanneqarnerusariaqarpoq, aamma tuluttut oqaluffiusuni ilinniarnermut atatillugu sungiusarnernissaat periarfissinneqartariaqarpoq.

Ilinniakkat ataasiakkaat pitsaasumik imaqarnissaat qulakkeerniarlugu ilinniartitaaneq eqaatsuusariaqarpoq.

Ilinniartitaanerit inuussutissarsiornermut tunngassuteqartut sutigut tamatigut qaffassassarneqartariaqarput nunatsinnilu pisariaqartinneqartunut naleqqussaavigineqartariaqarlutik, qallunaat periusaat malinneqaannarsinnaanngilaq.

Ilinniartitaanermut, ilinniartitseqqiisarnermut pikkorissaasarnernullu aningaasaliissutaasartut nunatsinni nunaqavissunut tunngatinneqartariaqarput, pissusissamisuumngilarmi inuit sivikittuinnarmik nunatsinniittartut nunaqavissunik inagiisimajarnerat.

Inuk tatigalugu – siunissaqarneq upperalugu Siumut sulivoq. Tamannalu toqqammaviuvoq.

Taama Siumup anguniagaasa ilaat matumunnga apeqqummut tunngassuteqarsin-naasut aallarniutigeriallugit ilaatigut makkua aamma oqaaseqaatitsinnut ilanngukkusuppagut.

Siumup pingaartilluinnarpaa oqartussaaffiit naalakkersuinikkut susassa qarfigineqartut suleqatigalugit suliffinnik misiliilluni ilinniarnarup nalaani ikippallaarnerujussuisa amerlisarnissaat. Taamatuttaaq oqaatigisariaqarsoraarput pisortat suliasaqarfiisa ataaniittut kisimik isumalluutiginiarneqarsinnaanngimmata, taamaattumik pisariaqarpoq inuussutissarsiortut tamarmik peqatigalugit aqqissuussaannerup suliarinissaa.

Amerlaasuutigut naalakkersuisut akissuteqaataanni pisariaqartinneqartut oqaatigineqarmata ilalerlugit Siumumiit oqaatigissavarput.

Naggataatigullug oqallisissiorlut qutsavigigatsigit oqaatigissavarput. Tassami apeqquq qaqqinneqartoq pingaaruteqarluninarmat oqallinneq uummaarissumik ingerlassasoq neriuutigaarput.

Ineqi Kielsen
Siumut